

王爺奶奶 黃啟晉

還細个時節，識聽阿姆講過麟洛老姑婆个故事。佢講百過年前，每日朝晨頭都有盡多个婦人家擱等裳服，在麟洛溪个河脣洗裳服。有一日朝晨，徐家阿妹同大家人共下去河脣，忽然間聽到打鑼敲鼓个聲音，原來係九塊屋（今下个屏東縣九如鄉）个三山國王个轎仔入庄。毋過單淨阿妹看到一個著等黃袍，又騎等白色馬仔个（英俊）細俵仔，定定欵行入來庄項。阿妹看到講：「係做得嫁分佢做姐仔，佢就蓋幸福耶！」脣口个婦人家聽到，都嚇到一下，問佢做麼个恁呢講，佢毋講話，繼續洗裳服。無幾久從圳溝上背流下來一個木盒，阿妹同佢送開，佢又流歸來阿妹脣口，再送又再流歸來。阿妹感覺蓋奇怪，就同木盒打開來看，底背有聘禮。阿妹同戒指戴項來，嘎脫毋下來。從該下開始，阿妹个身體就毋好，每日都無精神，飯也食毋落，無幾久就緊發燒，在眠床項對等屋下人講：「感謝爺哀个照顧，因為自家愛嫁分九塊屋三山國王个大王爺，大王爺愛來接佢歸九塊屋欵，佢等會來屋下討親。」講係阿妹就過身欵。過無幾久，九塊屋个三山國王廟真實來麟洛个徐家討親，完成這神人聯姻个好事。過後在三山國王廟个後殿，有一尊徐家阿妹个神像，九塊屋个後輩子孫都喊佢「王爺奶奶」，毋過麟洛人顛倒喊佢「老姑婆」。也因為係兩庄結親，故所後輩子孫有「九如姐夫、麟洛大舅」个親戚姻緣。

因為阿姆係麟洛妹仔，故所佢等就珍等佢喊老姑婆。阿姆講老姑婆到欵九如後，庄肚个細人仔就變个盡聽話，每一年个元宵節，佢也會搵手大王爺出巡，

看看九如、麟洛个細人仔，保佑佢等个平安。毋過老姑婆乜會想屋下，大王爺就會留在庄項，請二王爺、三王爺陪等老姑婆歸麟洛。講也奇怪，老姑婆轉妹家該日暗晡，歸个九如庄个細人仔就會噉無停，大人儕怎樣安都無用，等到老姑婆歸來後就好欸，故所鄉民都蓋毋好佢轉妹家。毋過老姑婆還係人家个妹仔，愛佢毋沒轉妹家，哪有可能呢！

這幾年，屏東縣政府同麟洛鄉、九如鄉公所共下舉辦「九如鄉王爺奶奶轉妹家」个活動。每年過年前，老姑婆係有指示今年想轉妹家，三山國王廟就會通知麟洛鄉民，鄉民就會像做好事共樣去九如接老姑婆歸來歇，接等連續三年都會歸來麟洛妹家歇一陣仔，順續繞庄保佑村民平安，該時節歸个麟洛庄就像做好事共樣，大大細細會在屋下門口準備水果同糖仔，來同老姑婆唱喏祈福，盡鬧熱啲！吾阿姆同大姨最好看老姑婆个金身，看到坐在轎仔項个老姑婆恁秀氣，佢等也會為佢感覺到幸福。到欸老姑婆愛歸九如，鄉民又會到老姑婆屋下去兜鬧熱，因為老姑婆毋盼得歸九如，該轎仔就會在門口緊入緊出，看到實在毋盼得。連續三年歸麟洛後，就愛等到下二擺个指示正有歸來欸。

該條老姑婆洗過裳服个圳溝還在，堵好在吾外阿公个田坵脣。還細个時節，佢等不時在這擲石頭、撈魚仔。過後有人蓄豬仔，該水就變个盡臭，圳溝壁也起高，無法度行下去欸。毋過逐擺歸到這位，佢就會想到老姑婆个故事，還趣味啲！。

~~ 作者為屏東縣育英國小教師 ~~